

## Tra li nuvuli a tia vidu

Cci dissi a li nuvuli di furnàri  
la to facciuzza bedda.  
Vogliu videri si m'ascùtanu.  
Ogni jornu isu l'occhi n'celu  
pi videri li nuvuli si m'ascutaru,  
mancu sacciu si tra iddi si parlaru.

Certi voti parica si fòrmanu,  
po s'allàrganu e tuttu scumpari.  
Haiu l'occhi sicchi e stanchi,  
capisciu ca chiedu troppu,  
ma siccomu lu chiedu cu amuri,  
iu dicu ca m'accuntenta lu Signuri!

Chi fussi bellu videri la to facciuzza  
n'celu, anchi si durassi un minutu,  
tempu di scattari na fotografia.  
Accussì la facissi videri prima  
a tia e po a tutti la genti  
si nun mi crìdinu, nun mi 'mporta nenti.

Tra li nuvuli a tia vidu, veru dicu  
ma nuddu mi cridi, mancu tu.  
Appena cci fazzu la fotografia,  
po videmu si è veru o nun nne veru!  
Quannu l'amuri cc'è tuttu s'avvera  
pi fina lu sulì arrussisci di sera.

Certu cci voli pazienza, sti piaciri  
sunnu pirsunali, nun nne di tutti  
ca si lu ponnu pirmèttiri.  
Iu ca sugnu un pueta fantasiusu,  
mi pozzu pirmetiri chissu e atru,  
pirchè si dici ca l'amuri è latru.

Pi amuri, pi fina a tia arrubbassi,  
accussì sulu, lu me cori s'accuntintassi.